



**POLELO EA MOTLATSI OA TONA-KHOLO**

**MOHLOMPHEHI MATHIBELI MOKHOTHU**

**HO SECHABA SA BASOTHO KA 'MOKA OA MASHOME A  
MANE A MOTSO O MONG OA LIHLOOHO TSA LINAHA LE  
MEBUSO TSA MOKHATLO OA LINAHA TSA SADC (41<sup>ST</sup>  
SADC SUMMIT OF HEADS OF STATE AND  
GOVERNMENT)**

**LILONGWE**

**REPUBLIC OF MALAWI**

**18 AUGUST, 2021**

## **1. SELELEKELA**

### **Sechaba sa Basotho ka kakaretso,**

Letsatsing la kajeno ke lakatsa ho le khoallela mats'ela-nokana ho hlaha 'Mokeng oa Lihlooho tsa Linaha le Mebuso tsa SADC, o tšoaretsong Naheng ea Malawi. Ke etelletse pele moifo oa Lesotho 'Mokeng ona o fihlileng pheletsong letsatsing lena. Moifo oa Lesotho 'Mokeng ona o ne o bopiloe ka, hara ba bang, Letona la Litaba tsa Machabeng, Mongoli e Moholo oa 'Muso, Motlatsi oa Mongoli e Moholo oa Lekala la Litaba tsa Machabeng, Moemeli oa Lesotho Naheng ea Afrika Boroa le Malawi, Mohlanka oa Phethahatso oa NRA, le ba bang. 'Moka ona o tsoetse pele ho tloha ka la 17 ho isa ho la 18 Phato, 2021. One o ile oa etelloa pele ke liphutheho tse ling, ho kenyelletsa le tsa Matona le Liofisiri tse kholo tsa 'Muso.

'Moka ona o ne o tšoeroe ka tlasa sehloho (**Theme**) se latelang: "Ho Matlafatsa Tlhahiso le ka hara Koluoa ea COVID-19 molemong oa kholo ea Moruo ea moshoelella le kholo ea li Industeri". (Bolstering Productive Capacities in the Face of COVID-19 Pandemic for Inclusive, Sustainable Economic and Industrial Transformation).

## **2. LITABA TSE TSOHLILOENG**

### **2.1 Malebana le Lesotho**

Ho ea lokela hore ke le hopotse Basotho hore SADC e ntse e lisitse litaba tsa Khotso le Tlhopho Bocha Naheng ea Lesotho, ka leihlo la Hlooho ea Naha ea Afrika Boroa, President Cyril Ramaphosa, eo e leng Mokena

Lipakeng litabeng tsa Lesotho. Ka lebaka leo, Lesotho ke engoe ea Linaha tseo maemo a renang ho tsona a lipolotiki, tšireletso, botsitso le Khotso, a tšohloang liphuthehong tsa Lihlooho tsa Linaha le Mebuso tsa SADC. Ka hona, `moho le Mokena Lipakeng, re ile ra lokela ho fana ka tlaleho `Mokeng ona.

Ke totobatse hore hara tsona, thahasello ea rona re le Naha e ntlheng ea Tlhopho Bocha.

## **2.2 Tlaheho holima litaba tsa Lesotho**

`Moka ona o tsohlile lintlha tse `maloa haholo. Empa ka kotloloho litabeng tsa Lesotho, ke ile ka teka tlaleho malebana le khathelo pele ea litaba tsa Tlhopho Bocha. Ke supile hore re hatetse pele ka leeto lena, `me litšoantšo tsa Molao li teng ho pakahatsa taba ena. Ka tsoela pele ho bontša hore re mothating oo Lekhotla la Tlhopho Bocha (NRA) le ntseng le sebetsana le lihloathiso Molaong oa rona oa Motheo ka ha e le ona o tla seea qholo hore naa melao e meng e qale kae e felle kae. Ka tsoela pela ho elelloisoa `Moka hore haufinyane Paramente ea Lesotho e tla tšohla Litšoantšo tsena tsa Molao tse tsoang ka hare ho NRA.

Ke tsoetse pele ho totobatsa hore Tlhopho Bocha ke monyetla o tlang hang molokong, `me re le Lesotho re ikemiselitse ho tsamaea leeto lena ho fihlela pheletsong ea lona. Ka qetella ka ho supa hore Khotso, Bonngoe le Poelano ea Sechaba, ke tsona tse ka atlehisang morero ona o motle oa Tlhopho Bocha. `Me ka tiisa hore re ikemiselitse ho ntšetsa lenane leo pele.

Tlalehong ea hae ho 'Moka, Hlooho ea Naha ea Afrika Boroa, Mohlomphehi Cyril Ramaphosa, o ile a supa hore o khotsofetse ke khatelo pele litabeng tsa Tlhopho Bocha Lesotho. A re ha ho qeea-qeeo hore mosebetsi o mongata o tla be o phethiloe pele ho Likhetho tse akaretsang tsa Lesotho isao. A ipiletsa ho 'Musu oa Lesotho ho akofisa phethahatso ea Tlhopho Bocha le ho kenya tšebetsong lenane la khotso le poelano (Peace and Transitional Justice).

### **2.3 Liqeto tsa 'Moka litabeng tsa Lesotho**

'Moka o entse liqeto tse latelang holima litaba tsa Lesotho:

- Ho thoholetsa Naha ea Lesotho ka khatelo pele e totobetseng litabeng tsa Tlhopho Bocha, le ho ipiletsa ho 'Musu oa Lesotho ho akofisa phethahatso ea Tlhopho Bocha;
- Ho elelloa bohlokoa ba lenane la Khotso, Bonngoe ba Sechaba le Poelano e le motheho oa Tlhopho Bocha le ho khotthaletsa Lesotho ho tsoela pele ka leeto leo ka morero oa ho tlisa phoolo le bonngoe;
- Ho ipiletsa ho 'Musu le Paramente ea Lesotho ho kenya tšebetsong (domesticate) liqeto tsohle tsa SADC holima Lesotho ka ho etsetsa liqeto tse joalo melao;
- Ho thoholetsa Hlooho ea Naha ea Afrika Boroa, ka mosebetsi o bokhabane oa hae e le Mokena Lipakeng Litabeng tsa Lesotho;

- 'Moka o ile oa boela oa etsa khothalletso e matla ho 'Muso oa Lesotho ea hore nako ea Lekhotla la Tlhopho Bocha la Lesotho (NRA) e eketsoe ka likhoeli tse ling tse tšeleletseng ho tloha la 31 Mphalane, 2021 ho isa la 30 'Mesa, 2022;
- Ho eketsa nako ea President Ramaphosa e le Mokena Lipakeng litabeng tsa Lesotho ho fihlela ho tšoaroa 'Moka o hlahlamang ona (42nd Summit of SADC).

## **2.4 Liqeto Litabeng tse Ling tse Tšohliloeng:**

### **i. Ho thehoa ha Paramente ea SADC**

- 'Moka o entse qeto ea hore Sethala sa Maparamente a SADC (SADC Parliamentary Forum) se phahamisetsoe boemong ba hoba Paramente ea SADC;
- Paramente ena ha e na ho ba le matla a ho etsa Melao holima Linaha tsa SADC, empa e tla ba le matla a ho eletsisa le ho hlophisa litherisano lipakeng tsa mebuso le baahi ba tikoloho ena ea SADC;
- Tebello ke hore Paramente ena e tla qala ho sebetsa ka selemo sa 2024;

### **ii. Phano ea Boemo ba Bolebelli (Observer Status) ka hare ho African Union ke Molula-Setulo oa Komisi ea Mokhatlo oa Africa**

- 'Moka o tšoetse ka mathe qeto ea Molula-Setulo oa Komisi ea Mokhatlo oa Kopano ea Linaha tsa Africa (African Union Commission Chairperson), Monghali Moussa Faki Mahamat, ea ho fa naha ea

Israel boemo ba ho ba Molebelli ka hare ho Mokhatlo oa Linaha tsa Africa (African Union);

- Lihlooho tsa Linaha li bontšitse ho tšoenyeha ho hoholo ka qeto ena ka ha e le khahlanong le metheo ea African Union (AU Constitutive Act), etsoe e bile e fihletsoe ho sa ba le litherisano le Linaha tsa Africa ka boemo ba tsona e le Litho tsa Mokhatlo oa African Union;
- 'Moka o ile oa supa hore Israel e ka amoheloa feela ha eka ikobela meoloane ea khotso 'me ea emisa bohatelli le boikhapelo ba Naha ea Palestina ekasitana le ho hlompheha Liqeto tsa Mokhatlo oa Machaba a Kopaneng (United Nations);
- 'Moka o entse qeto ea hore ho ngolloe Molula Setulo oa African Union hore ho huloe qeto ena ea Molula-Setulo oa Komisi, 'me taba ena e tle e tekoe ka pele ho Lekhotla la Matona a Litaba tsa Machabeng a African Union (AU Executive Council), e nto fetela 'Mokeng oa Lihlooho tsa Linaha le Mebuso (AU Assembly of Heads of State and Government).

### **iii. Khetho ea Mongoli oa Phethahatso oa SADC (Executive Secretary)**

- 'Moka o entse qeto ea ho khetha Monghali Elias Mpedi Magosi oa Botswana, ho ba Mongoli e mocha oa Phethahatso oa Mokhatlo oa SADC. Monghali Magosi o hlahlama Mohlomphehi 'Me Stergomena Lawrence-Tax ea behang meja fatše ka mora lilemo tse robeli boemong bo joalo;

#### **iv. Seoa sa COVID 19**

- Lihlooho tsa Linaha le Mebuso li boetse li ile tsa hlahloba boemo ba koluo a kapa sona seoa sa COVID-19 ka hare ho Tikoloho ea SADC;
- Tsona li ile tsa bontša ngongoreho ke tahlehelo ea maphelo, le ho thefuleha hoa moruo le khoebisano,
- 'Moka o entse khotlaletso ea hore linaha tsohle tsa SADC li kenye tšebetsong maoa a ho loantša lefu lena le matšolo a ho hlahlobela sechaba lefu lena ka sepheo sa ho elelloa maqhubu a macha kapele molemong oa ho nka mehato e nepahetseng pele maphelo a Sechaba a lahleha.
- 'Moka o ile oa tsoela pele ho etsa khotlaletso e matla ea hore linaha tsa Afrika li hlahise liente le meriana, ekasitana le hona ho sebelisana 'moho ho reka liente ka sepheo sa hore li anele bohle;

#### **v. Boemo ba Khotso le Tšireletso Naheng ea Mozambique**

- 'Moka o fumane tlaleho ea mehato e nkiloeng ho loantša bokhukhuni Profensing ea Cabo Delgado Nahaneng ea Mozambique. Mehato ena e kenyelletsa ho romelloa hoa Lebotho la Sesole la SADC (SADC Standby Force) leo Lesotho e leng karolo ea lona;
- Le tla hopola Basotho hore Naha ea Lesotho e ntšitse lebotho la Sesole ho ea etsa tlatsetso koluoeng eo ea Mozambique. Re na le tšepo e tiileng ea hore mokhethoa oo oa Sesole o na le boiphihlelo le litsebo tse holimo ho phetha mosebetsi oo. Le ha ho le joalo, ke

nka monyetla ona ho le mema Basotho hore re beeng bana bano ba Basotho lithapelong ba tle ba khutle ba bolokehile;

- `Musu o thoholelitse linaha tse kentseng letsoho ho bopa mokhethoa ona. Tsona li kenyelletsa Lesotho, Angola, Botswana, Democratic Republic of the Congo, Malawi, South Africa, Tanzania le Zimbabwe.
- `Moka o boetse oa isa mats'eliso ho Naha ea Botswana le lelapa la Corporal Ramagonono ea lahlehetsoeng ke bophelo kotsing ea koloi hona Mozambique.

### **Litaba tse ling tse hlahileng ka hara `Moka,**

Ke qetella ka litaba tse monate moo moithuti oa Lesotho a atlehileng ho hlaha maemong a bobeli thoholanong ea likolo tse mahareng ea ho ngola ka sehlooho se reng na SADC e kentse letsoho joang litabeng tsa Khotso le tsireletso lilemong tse 40 tse fetileng le hore na e ka etsa joang ho matlafatsa mehato ena ea khotso ka hare ho tikoloho ho ea pele. Moithuti enoa lebitso la hae ke Tholang Thejane, oa Sekolo se phahameng sa Abia (Abia High School).

Re motlotlo ka tšebetso ena e ntle, `me re thoholetsa moroetsana enoa, lelapa labo le litichere tsa hae. Re lumela hore re satla khola tse ngata tse molemo bophelong ba morali enoa oa rona. Re ea mo lebohela ke hona, `me re tla etsa litokiso tsa hore khau ena e nehelanoe ka molao ke `Musu oa Lesotho lebitsong la SADC.



## **KAKARETSO**

`Moka ona oa SADC o fihlile pheletsong ka katleho, `me oa ba oa fihlela sepheo sa ona. Liqeto tse fihletsoeng, le lipuisano tse mofuthu tse bileng teng, ke sesupo sa hore bonngoe le kopano ea Linaha tsa SADC (Regional Integration) li hatetse pele haholo. Thapelo le tšepo ea rona ke hore Linaha tsohle tsa SADC li tla tsoela pele ho tšoarana ka matsoho ho holisa Mokhatlo ona molemong oa boiketlo ba baahi ba Tikoloho ena ea rona.

**KHOTOSO PULA NALA!**